

四庫全書

集部

欽定四庫全書

集部

芸庵類藁卷二

詳校官庶吉士臣何道沖

主事臣呂雲棟覆勘

謄錄監生臣馮克翠

欽定四庫全書

集部四

提要

芸菴類稿六卷

別集類三 宋

臣等謹案芸菴類稿六卷宋李洪撰洪姓名  
不著于史諸家書目亦未載有是集惟永樂  
大典頗散見其文又別出陳貴謙原序一篇  
稱洪為李正民之子又稱為滕州使君知洪  
官止知滕州集中又有扈從朝德壽宮景靈

宮詩則曾為京朝官有在溫州題其父手澤詩稱嗣子守官於此則曾知溫州其他不可復考矣正民本揚州人南渡後僑寓海鹽故洪集中如烏龍井廟迎送神詞之類皆在海鹽所作而卜居飛英坊一首乃云東書辭都門整棹還苔川則洪後又移居湖州乃兩郡紀流寓者俱不及其父子則由遺集散佚徵文獻者罕及也洪所作詩雖骨幹未堅而神

思清超時露警秀七言律詩尤為工穩足以  
嗣響正民陳貴譙序稱原本二十四卷而今  
所掇拾僅得詩詞三百九十餘首文三十首  
視原集祇十之三四亦云僅矣據所存者釐  
為五卷而以雜文一卷附之畧具梗概俾不  
致終就泯沒焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀



原序

大隱先生李公侍郎諱正民在中原時以文章名天下  
渡江南來扈從巡守參為名命條畫軍國大計于艱危  
時最號忠力諸所論撰亦既盛行于時其子藤州使君  
諱洪則有芸庵類稿二十卷貴謙得而讀之因竊有歎  
昔者士君子之學皆以養氣為本文章者益氣之所寓  
而氣非專于為文也侍郎君歿且八十餘年讀其文凜  
然猶有生氣若使君所著該括衆體每于草木鳥獸之

微有可寄興以為忠邪賢否之辨者未始不反覆致意  
仰冠萊公之忠大顏平原之節慕陶淵明之隱斥盤谷  
李愿之汰而知韓子有為言之也其視前所謂凜然者  
似之非耶夫長江大河迤延浩汗雖其包納深廣要亦  
發源之遠與衆水異爾古之人不以著姓世祿為賢而  
以立功立言為不朽蓋謂是也使君長子吏部直養嘗  
以使事至襄陽兵間風績甚偉次子直柄令守湖南望  
郡有治理行見世其家者殊未艾也觀是篇者又可以知



其傳矣陳貴謙序



欽定四庫全書

芸庵類藁卷一

宋 李洪 撰

賦

適越賦

出脩門而東驚兮駕靈胥之怒濤命榜人而理櫂兮御  
龍驤之巨艘睨組練之噴薄兮忽鵝鸛之鳴號江海冰  
彌以東注兮雉堞屹然而增牢啓東南之王氣兮應赤  
縣之神臯仰中天之華闕兮非煙鬱以霞韜慶警蹕之

清夷兮見弓矢之載囊  
屈西陵以爰憩兮灌木蔚乎蓬蒿  
叢祠鴉噪而日暝兮古戍鬻海以烹熬  
越山千嶂以相矗兮斷港縈迂而一篙  
臨錢清之汐浸兮拖廢埭之輕艚  
覽禹穴之負古兮嗟會稽之棲勞  
悼壯圖於種蠡兮鐫諂辭於斯高  
眺蓬萊之清勝兮懷蘭亭之雋髦  
史遷之游孰繼戢山之扇誰操  
少陵壯節之英遊兮太白俊逸之詩  
豪泛鑑湖之佳致兮羨外監之嬉遨  
讀幼婦之刻辭兮遺貌標夫孝曹  
弔貞魂於千載兮奠桂醕之

單醪夜宿上虞舜風所陶民淳尚存於濬井鳥馴猶象  
於耘耨三江既泛其洶湧萬壑亦飫於嶠槽姚江縈帶  
而並海兮四明勃鬱以周遭山峭拔而益竒溪洄洑而  
滔滔雲獻狀而絕態松逞姿而蜩毛猿清吟而送客竹  
蕭蒼而解苞雨淙淙而鳴瀑風颼颼而勢鬬予既冥搜  
而遐矚聊舒嘯以抽毫

苦益菜賦

并序

李子閒居自暇從老圃灌畦毓蔬日忘其勞客有以山

中苦益菜為餉殖芼調飭嘉其小苦微甘咀嚼雋永似  
乎忠臣醫國之言也賦以自廣瞻清晨之始旦獨植杖  
而灌園朔望舒之落月逆扶桑之朝暾零露漙兮薤本  
敗葉委兮葵根紛冒塹而甲拆擢翠羽以庶蕃顧不熟  
而為饑豈飯芼於盤殮時乃享庾郎之三九擅諸葛之  
五利想千里之蓴羹擷五溪之春薺誑杞菊於天隨嗜  
芥芹於羊鼻人覓發園官之譏馬蘭寓玉川之意客有  
拔後茂於山椒濯滄浪之水裔羞我鼎鉶芼之薑桂其

苦口若批

音必結反

鱗之切諫其愈疾若上池之良劑甚宏

染指而化碧賈誼濡脣而流涕故國醫鍼在育之疾忠  
言趣躡足之計既謙受而為益信雋永之有味彼啜羹  
之少恩不如放麇之多仁紵臂而得食有類轅釜之無  
親肆甘言之從憑美佞古之囁嚅鼻莫辨於薰蕕憂寧  
忘於萱蕕矧茲菜之耿介宜棄置於路隅然而歲寒後  
凋者松栢所獨主聖臣直者社稷之福鑑至明者察妍  
蚩於顧盼水既止者視毫髮與眉目從諫有轉圜之易

去佞無拔山之酷漢文除挾書之禁堯庭設誹謗之木  
嘻其甚哉此野人炙背之獻異聖哲啓心之沃徒采薇  
於西山慕白駒於空谷固不足以當宣室前席之咨而  
備廣厦細旃之瀆

哀巖桂賦

并序

版曹廳前有巖桂焉根幹凋瘁枝葉萎薊秋八月山中  
之桂爛然吐芬芳鄉人茲桂也封殖失地坐視羣葩  
競秀不能榮擢其華爭妍一時客有白事長貳退而問



於李子僕對曰木猶人也士之賦材稟教懷文抱質不  
猶此木之受氣毓形乎種學績文澡身浴德不猶此木  
之芬芳郁烈乎挺姿歲寒老死巖穴不猶此木之託植  
山谷乎彈冠結綬願登王畿不猶此木之徙幽崖而入  
帝鄉乎逮其爭春於蒲柳之側承澤於文昌之臺見辱  
皂隸取誚輿僮日滋月往遂為枯莢不亦可哀乎客又  
何怪客踞而請子其賦之僕曰唯唯伊金風之浩蕩兮  
將摧殘於衆芳何巖桂之挺特兮獨稟粹于顯商著家

聲于荒遠兮擅蟠根于后皇  
亶毓靈于蟾窟兮迺移植  
于帝鄉擢自拱把斲彼巖隈  
小山叢生而寓興墨客一  
枝而寄懷竟悵望于空谷  
思委質于瑤階時也少昊回  
御萬寶向成蘊通犀之內  
德藹文客之擅名露漙漙兮  
僊掌借潤風嫋嫋兮天籟發  
清或秀拔夫差之茂苑或  
香動東甌之粵城鞠衣沮  
豔蒼蘊慚馨懼過時而薄采  
羞自衒以含情則有騷人  
逋客頭陀煉士或棲山廬之  
寂寥或飲沆瀣而度世既迢  
遙於間曠亦泯絕於勢利

乃吸墜露以嗅其菁英展緘衣而收其荇藻或佩服以  
配秋蘭之紉或薰沐以陋薔薇之水非其標致不凡安  
得賞玩若此至於結根靈園託體連昌晞鳳蓋之朝日  
被龍顏之末光白榆歷歷於天上江梅垂垂於玉堂依  
堯莫而並砌嗤漢栢之為梁今則立文昌之禁省眩金  
爐之夕燠地近左戶時當小春無連珠聚星之吟客有  
鞭算心計之重臣惟國用之所制匪詞人之擬倫埋沒  
於喧囂倥偬之地低回於霜霰風雪之辰纖柯困於敲

榜蒸粟化於緇塵俗眼屢白捧心漫顰莫不對春雨而  
泣泣望秋日以傷神然其深根固蒂而負歲寒之期改  
柯易葉而無搖落之變儻遇鄒律之吹噓郭駝之善幻  
濯錦成椹木之園博望致蒲萄之館沐之以西湖之清  
波植之以孤山之絕岸尚能偃蹇嫵姍於靈鷲之崖翦  
蒼蕭森於廣寒之殿毋入門而見嫉豈深谷之徒怨也  
於是子墨客卿起而為山中招隱之辭曰秋桂叢生託  
巖阿兮團欒後茂稟太和兮回谿深壑水揚波兮秋風

披拂蘭菊芳兮郁烈裊娜芬都房兮一粟粒中萬斛薌  
兮山中之人玉雲顏兮薜荔女蘿蒙譏訕兮歸歟歸歟  
保歲寒兮

雙鶴賦

并序

侍講舍人胡邦衡清節忠言冠冕當代具疏誅姦明若  
著龜厭服天下若漢汲大夫近古社稷臣炳炳千古名  
烈莫二方犯雷霆之怒回薄嶺海南極窮髮二十六年  
處之泊焉與造物者遊晚際上皇更化趣使來朝轍環

萬里入天宮冠蓬省司言動掌綸制今天子優禮舊德  
以祭酒侍經幄日進嘉謨陰功隱利膏澤天下多矣直  
廬靜深庭有一鶴緇襟俛啄戛然長鳴命儔寥廓俄有  
胎禽玄裳羽衣將翔將翔軒然來儀麾之不去遂玩雙  
鶴昔趙清獻入蜀以一鶴一龜自隨李文正公居洛亦  
名六客鶴其一焉惟公清節可媲清獻而謨猷剴切視  
文正無愧將晉秉國鈞為社稷鎮功成身退從赤松遊  
雖驂仙人之騏驎朝玄圃而夕瀛洲為不難也賦曰敬

直廬之靚邃兮有獨舞之胎仙服深衣之古雅兮視倒  
景以留連神清臞而貌閒曠兮若俛啄於芝田時戛然  
以長鳴兮由命侶而翩翩嘉此九臯之逸翮兮擅凌虛  
而得仙斯真人之騏驎兮著法相於浮丘之篇公方愛而  
玩之兮誦藥珠以延年舞琴心之三疊兮挹洪崖以拍  
肩愍茲世之垢頑兮遂謁帝於鈞天冠切雲而佩陸離  
兮褰離芷而紉蕙蘭建十絕之桂旂兮鏘玉鑾而中周  
旋闔九閭之螭獲兮厲貔貅之當關羣犬狺狺以吠日

兮駭嗟欷之嘖嘖彼衆口之鑠金兮競兒柔而婢顏撫  
長劍而拂旬始兮斬猋猋而落女媧挾日月以陵清都  
兮讒夫媚予之昌言排閭闔而躡泰階兮悵幽憤之莫  
蠲下大荒而隘宇宙兮絕瀛海以南轅亂湘波而愍英  
皇兮從虞巡而弗還投雄詞以悼靈均兮痛汨羅之沉  
冤上九疑以望蒼梧兮聞韶音而忘餐涉窮髮而歷僭  
耳兮雖九夷而亦安躬踐蛇以茹蠱兮豈能侵靈府之  
浩然慨歲月之何永兮再終星紀之二躔視蠅營與狗



苟兮皆萬墳之壓顛帝秉錄以賜環兮入承明而侍細  
旃非向之騎麒麟而控仙驥兮支造物而遊廣寒又安  
得茲羽鶴也感在陰而儷焉亶中孚之信及豚魚兮羌  
孰得而究研歎鳳鳥之不至兮聖若宣尼而有言也廣  
大鵬而作賦兮白乃憤發於塵編也感鸚鵡之入貢兮  
愈自傷於述邇也因鸚鵡以娛賓兮衡亦罹夫巧譎也  
維茲雙鶴之偉觀兮託君子而稱賢也亂曰洪範五福  
貴眉壽兮詩人作歌惟黃耆兮懿茲胎禽寥廓偶兮翩

然來儀如賓舊兮千年毳翎天地久兮清獻之清文正  
友兮公致太平垂不朽兮萬古仰之如泰斗兮

殤幼賦

并序

余稚子直均未字而天余與妻盛哭之哀而不成聲嗚  
呼吾兒踰晷而能行聰悟而敏慧甫三歲已能捉筆模  
字效兄姊誦書不忘生之歲月時幹全甲戌庚皆居寅  
合於日之亥不幸遇疾余有五林之役歸自外疾革視  
之形神離矣嗚呼痛哉昔羊祜五歲探桑木中金環白

樂天七月能識之無古皆謂再來嗟乎人稟一真之性  
幻滅幻生汨於生死大苦海中自非上根頓悟通其夙  
命者孰能超出輪迴非幻不滅而脫離生死究竟真諦  
也哉余視其母悲傷弗忍忘作殤幼之詞極於性命生  
死之說塞余悲焉嗟人生於萬化兮汨真識以嬾形稟  
五緯之純粹兮託二儀以毓靈視幻滅於瞿曇兮齊壽  
夭於殤彭哀穉子之韶美兮甫弱歲之三齡既穎異而  
翹秀兮暨學語而和平詫庭蘭之茁茂兮齊玉雪之敷

榮余薄祐而鍾罰兮痛天闕於孺嬰訴九閭之窸窣兮  
闔北辰之列星彼穹穹與昊昊兮臨下民而俯聽杳不  
聞於哀籲兮氣漸盡而冥冥割衷腸之九回兮懷菀蘊  
而填膺搥衣篝之故迹兮時誤稱於遺名慙號咷於慈  
母兮傷憐怛於姊兄惆恍而疑其死兮杳不聞於履聲  
惓然而謂之生兮訝泯絕而無徵沕神理之茫昧兮戢  
精爽之依憑風飄飄而振幃兮雨淋淋而實楹草黃緣  
而依砌兮雀躑躅而悲鳴恍春暉之芳芷兮忽霜霰而

先零視崦嵫之頽景兮悵營魂之遐征  
竊黃壚而閱質兮無彷彿於平生  
諱曰泣既盡而繼血兮髮變白以垂  
領瞭濁昏而喪明兮涕橫集而委綆  
哀稚子之無年兮即厚夜而徂永  
悲童烏而草玄兮踵叔子之探環懷  
東門之曠達兮豈情鍾而愛捐覺大夢  
以遽然兮銜永疚於終天  
悟龜毛於真詮兮將返初於泰始  
又安得羽化而飛仙

五言古詩

殘春雨夜讀陳子高詩用其韻

春事忽已闌年華何駛急客子困窮年卧若蛇蚓蟄泥  
深沒屐齒市橋燈熠熠殘缸玉蟲綴簷雨泣如泣歸期  
儻有徵緩我百憂集余生本畸人三年楚囚繫經商逐  
毫末索米恩畿邑君門深九重無籍豈敢入涸轍望斗  
升然挂炊玉粒妻孥寄田廬誅茆冬未葺竭來幾弦晦  
漏屋想沾濕但喜一犁足犇犢起解解耕耨貴及時歸  
歟具簞笠

贈史康時二首

叔夜

史侯眉山英壯歲陪戎旃胸蟠九雲夢筆倒三峽泉封  
侯直易爾唾手平幽燕相國昔分陝幕府羅雋賢公於  
二三子骯髒孰差肩綸巾白羽扇談笑清渭汧功名晚  
蹉跎肯著祖逖鞭南游上會稽却泛洞庭船九嶷多隱  
逸千里跨馬羈邂逅闔閭城傾蓋欣忘年誦我阮籍詩  
三歎涕泗漣客懷已趣裝握手臨道邊歸歟指衡麓未  
辦買山錢他年遇回雁寄我湘中篇

霜飈何淒冽歲晏同漂泊男兒志四方寧久怨落魄懷  
忠思報國結義重然諾死生貧賤間交情今寂寞羞觀  
世態澆未遇所立卓英袞卧東山南極仰衡霍復期寓  
縣清重使混沌鑿會見官儀修再卜東邑洛否運行當  
傾宇宙見開拓他年功名逼豈但持禁橐堂堂蒼鬚眉  
形貌畫麟閣如何決此行徑欲就邱壑五十非無聞斯  
文猶木鐸願保千金軀百鳥見一鷄

贈支提德最



我昔觀華嚴心熟毘盧境東南有支提千聖會巖嶺欲  
從善財問悵此路悠永竭來縻王事勝處每參請彈指  
開重樓結願發深省寄謝德雲師相見在別頂禪翁游  
江湖傳衣自雙徑向來梅子熟一衲伴千聖十年此跌  
坐樓閣方鼎盛夜闌撥爐灰衲也吾所敬我如老摩詰  
到處扣禪病接浙復過雲林端隔清磬

送江叔源除太府丞柯山需次

威鳳翔千仞覽輝以來儀天驥渥注種籥雲不受羈江

侯南國珍劒佩光陸離三道對清問萬言敷箴規雲霄  
跬步躡分教小差池中都冠蓋躔屈處金穀司秦課應  
遷格騰達當在茲元樞國士賞天子前席咨一言寤疑  
旒致主躋軒義抱負經濟才凜然諫諍姿朝陽慶鳳鳴  
冀北空騶驪士為知己用素蘊得盡施丞貳須要劇臺  
閣未應遲需次指柯山買船泛釣磯暑行戒接浙江邊  
遠風披病夫困塵土倚玉慙葭枝分攜莫能送別酒何  
堪持儻經子陵瀨掃壁尋題詩前途得好句慰我別後

思

過分水嶺

江南山盡處開闢如石門下有琴筑聲哀湍激箭奔殘  
雪護峯頂篁竹如四垣老翁僅百歲曝背抱兒孫問之  
不我謦嗒然而忘言疑爾秦人徒此類桃花源寒日欲  
西顏不容駐短轅驅車下山去逼耳聞清猿回顧但煙  
靄路絕無攀援他年儻再逢共醉老瓦盆

宿瑞巖示劉子厚

肩輿轉綠疇跨浦躡石梁暮投瑞峯宿野色雜莽蒼魚  
鹽海市隘松竹山徑涼解衣借僧廬煮茗滌枯腸頓忘  
庚火爭秋色已侵牀古戍此何夕冠蓋來徜徉一杯偶  
相屬荔丹咀冰霜哦詩興清絕天池看鵬翔

卜居飛英坊

束書辭都門整棹還苕川羈遊二十春寓農安一廛家  
無卓錫地三挈囊衣遷移居古城隅開門枕漪漣容膝  
居易安環堵地自偏水竹慚履道風物異平泉掃軌謝

奔競面壁參枯禪仰愧此坊名飛英馳日邊吾方師老  
圃樊須無間然何當畢婚嫁四十在明年

仙巖登覽

造物蘊神巧軒豁露真趣嵌空劃仙掌鑄拆噴石乳半  
壁垂鮫綃晴天灑飛雨捫蘿不知疲酷愛巖石古彼姝  
逝杳絕靈虬孰能覩玉冊閱篆籀三墳闕難補徘徊挹  
翠浪洗滌面塵土回輿帶夕嵐哦詩愧吳語

慶陵季文尚書休致會者三十一人各賦詩

尚書妙德望曳履聞直聲獻納雨露遑斯文有統盟重  
席侍經幄藻鑒持銓衡不憚推轂士規摹漢西京五色  
深補袞三入厭承明欸起尊鱸思徑作吳松行名位九  
牧聳富貴一毫輕徜徉雲溪上結廬依化城擺落軒冕  
累白屋倒屣迎實際契禪宗虛靜合僊經聖朝亟圖舊  
世臣重典刑蒼生望東山鹽梅待調羹引年章屢却勇  
決非矯情雍容進退間夷惠和且清出綸冠奎文安車  
示尊榮樂天宅池臺翁仲金餘籛公貴無留資韓宣有

卿名時方需大老復當佐昇平它年秉旄地堂上有奇  
兵恢復還舊都翠華駕云亭賤子荷英盼鍊句愧陰鏗  
請歌公歸兮盍使季札聽

移居

僦屋東甌城爽氣挹西山颶風忽作惡柴荆不容闕再  
徙得陋巷藩拔井亦智稍畢塗墍功已覺容膝安庭前  
木亦嘉修竹纔數竿幽豔海榴紅翠幄霜苞丹明窻寘  
棐几荒畦整藥欄兒曹頗解事掃徑見秋蘭鄰里來相

賀知我非熱官使令勿狙詐辦此良獨難未祭孫寶竈  
且樂陶令閒今日我重九一酌還酡顏

賦雪

閭闔風勢鬢朔雪夜方積窻隙散明璣瓦溝露微白謹  
譁競兒曹跼蹐愁病客漢淮鐵衣冷勦敵要長策安得  
郭代公英氣壓質勒又思李常侍銜枚擒蔡賊仰寬黃  
屋憂稍塞素餐責四郊正多壘萬室况艱食豈暇歌幽  
蘭但願豐穰麥早晚休王師奏凱獻酋馘



桃花菊

秋聲振窾木槁葉隨飛蓬起視籬下華灼灼天桃容天  
公等兒戲小草發纖穠乍疑武陵源秦人儻再逢又如  
靈雲老禪機投劍鋒疇昔糞土廣靖節吾所宗不然薦  
墜露三閭挹遐蹤呂令載黃花鞠裳表其衷濁醪亂眼  
纈衰顏暫時紅肯效玄都吟葵麥揉春風

七言古詩

新交行

君不見洛陽拜塵友欲取金印繫肘後又不見長安輕  
薄兒誰道青雲不可梯雨露翻覆豈無意炙手新交舊  
交棄華軒丹轂照青春列屋娥眉妬寵新若非大夫嘗  
便客亦是丞相拂鬚人車如雞栖馬如狗疾惡今無朱  
伯厚甘向青陵老種瓜肯效南山歌落豆直如弦死道  
邊杵臼論交世誰數翟公勒門吁可憐

子清弟赴丹陽賦古調餞之

酌君以烏程若下之酒贈君以魯山于蒹之聲酒以惜

在原兄弟之別歌以見愛民父母之情大江襟喉城鐵  
甕萬旅連營地勢重天弧北射掃欃槍雲陽健令時方  
用從官四十腰銅章萊衣弄孫娛高堂未妨束溼先馭  
吏立去敗羣如牧羊繭絲保障優租賦甌窶汙邪飽禾  
黍冠蓋使客應薦賢不日姓名徹當宁索別作惡殊勿  
勿呻吟病卧號秋蛩松竹讀書得新句緘題數寄北來  
鴻

送錢進思倅吳郡

繁雄茂苑侔漢輔森戟凝香古佳處鵷鷺行除半刺賢  
萬井提封賴摩拊公家名德世有人伯仲于今見伊呂  
妙齡籍甚馳日邊粉闥握蘭將振羽胡為補外便親養  
知己家庭真內舉畫鷁鳴鐃催去程垂虹松江對烟雨  
西北高樓插暮霞荷芰池光破炎暑平分風月助詩興  
一諾無事留公府却尋館娃歌舞地麋鹿臺荒盡禾黍  
劍池古色湛寒泉響屨採香迷島嶼仙鬼遺蹤杳茫昧  
臨賦餘情時訪古治中別駕稱展驥末俗嬖嬰譏越俎

簡書獄市抵胡粵末界馬牛視齊楚欲了官事兒輩癡  
鉗梏吏欺租賦簿退食蕭然絕點埃亦有佳客酬談麈  
想席未煖詔已頒穩上丹墀看布武故人貧病寄江湖  
一衲蒙頭參馬祖時憑尺素問沉綿臨別索詩愧吳語

前行路難馮公嶺作

君不見馮公之嶺摩蒼天危梁峻坂相屬聯樵夫跬步  
不得上仰視懸石勢欲顛下有飛泉瀉鳴瀑舂撞崑崙竇  
匯山麓飛流濺沫冰雪寒蘿薦荒林猿狖伏傍穿鳥道

人蹤絕怪石虎踞蒼崖裂捫參厯井路屈盤九折羊腸  
車軸折如何年少遠遊子擔簦躡屨來過此或欲挾策  
干君王亦有辭家遠從仕馬痛僕俸棲茅屋夜汲巖泉  
燃楚竹賜驛封侯事渺茫塗窮未免阮生哭遐想太古  
開闢初地隔東甌擅一隅山腰鑿石自何代要令海寓  
同車書不知馮公亦何者姓名宛與茲山俱我行適當  
三伏間靈霖積潦行路難家住太湖三萬頃煙波回想  
洞庭山

和家叔察院巨魚詩

滄溟浩淼浮寰區八紘九野水所儲介蟲族類信衆夥  
窮極詭怪堪嗟吁巨鰲鼉鼉冠靈島應龍連蜺領驪珠  
異哉斯魚盈百尺失水安得波濤俱妖蜃疑遭旌陽繫  
長蛟端被周處誅井蛙不識東海若鸞斯寧信北溟魚  
聚觀堵牆駭莫辨妄意其名能自呼髻鬣堅頑侔鐵角  
肌肉碩大爭翦除真成潜虬厄水滄誰謂王鮪惟山居  
矧過屠門快大嚼况鼓庖刀砉投虛罔能深藏類谷鮒

忽從變化同隙駒獨蠶豈羨簷何巧巨桴還笑任公踈  
灘渙寄命在頃刻神龍魚服喪厥軀嗣宗詩成出月脇  
博考傳記蒐秘圖餓氓殍腹屬厭幸嚮取凌晨俄過晡  
老饕染指飫鼉鼎里閭載酒行以車阿咸得句不敢出  
身同惠子方據梧暴殄天物古所戒志怪泚筆將特書

題水墨羅漢

大士神通超一切果成道備棲覺地龐眉山立孰寫真  
水墨良因作遊戲明窻槩几氎巾淨竹爐栢子香雲細



條繩乍解目增明短幅溪藤聯數紙當年意匠寄高遠  
慘澹風雲生眼底穹巖怪石隨步奇嶽鬼蠻奴凜生意  
僧繇未貌錦幪像道子曾罷長安市手攜貝多口忘言  
鉗瑩琉璃瞻舍利或嘿或語或慈威亦躡芒鞋將渡水  
天女獻供顏如蓮結習自空花墮袂神閒態逸讚莫窮  
墨妙筆精足珍秘蕭然着我巖壑中雁蕩經行恍能識  
詩成倒挽兩龍湫不用韓公為畫記

松皮香鼎

南山長鬣五大夫  
峩冠織翠華襟裾  
老藏山澤骨相臞  
捐軀鼎鼐計不踈  
偶向寒窻伴腐儒  
坦腹聳身止坐隅  
鼻觀如與芝蘭俱  
非煙非霧時有無  
愧爾不及清廟瑚  
竊蒙顧盼承吹噓  
彌明不解世俗書  
啞然尚能賦此乎  
我慙劉侯敢詆渠  
明憲畫永勤三餘  
三生結習痛掃除  
尚餘聞熏六鑿俱  
篆烟起滅凌太虛  
嗒然隱几無忘吾

憶雪歌

前年吳興雪三尺  
街頭十日無行跡  
南山千峰蟠玉虬

太湖萬頃鎔銀色腐儒凍死但長哦男呻女吟空四壁  
去年強鄰窺淮淝鐵馬成羣來塞北將軍授鉞橫瑯玕  
雪滿弓韜對勅敵捷書夜到甘泉宮玉靶角弓自天錫  
已觀積甲熊耳齊坐覺洗兵天河窄今年臘盡寓東甌  
地接炎方少三白梅梢柳眼漏泄春笋茁蘭芽遽堪摘  
冬深未省見冰霜挾纊無施况狐腋朝來北風吹石裂  
海氣嵐烟亂山碧遐想瑞葉舞層霄剪裁不費造化力  
豐年一飽戴君恩比屋千家消癘疫長江遠近要舒發

深恐陽驕無宿麥徒披鶴氅懷兔園速遣祥靈慰北客

迎送神辭

有序

紹興戊辰夏五月甲子迄八月丙戌不雨武  
原之旱視他邑為甚河流既斷禳祈逮徧苗  
稼盡槁丁亥邑令余衍稽之衆議請水于烏  
龍井翌日水次縣十五里驕陽如焚陰雲忽  
興雷雨隨至民大悅寘水佛祠緇素朝夕歌  
頌自是甘雨日以繼夜旬有二日四野霑足

已未邑令率父老送神歸之按是廟稱蘓臯  
二王吳驃騎將軍蘇舉字子羽葬於武原宋  
高祖嘗夢而異之封征南將軍明帝載加冊  
命又吳地志云昔有牛糞金邑人臯伯與弟  
逐牛入山土崩壓死今邑南金牛山是也龍  
井之始或傳神騅跑地出泉因以為名事載  
海鹽圖經傳聞邑之父老祭法曰能禦大災  
捍大患則祀之惟神之靈距今千年廟食茲

邑救此旱暵，肸蠭如答。是宜永崇廟貌，佑我黎氓。因採民謠，作迎送神辭，使歲時歌以侑

神

惟龍湫兮其源莫窮，利萬物兮精神可通。歲大旱兮我民之恫，酌彼泉兮神聽孔聰。擊鼓坎坎兮于神之宮，薄采溪毛兮饋進兩公。神欣欣兮鑒我民衷，神之來兮雨其濛。念我稼穡兮滌去熾熾，鉅罌甚小兮膏澤甚豐。驕陽摧威兮奔走豐霽，民之謳歌兮千古英風。

右迎神

旱既太甚神是籲兮一勺之水為甘靈兮伊神正直歆  
誠愭兮三日為霖彌旬注兮我稼既興舟在步兮微我  
兩公余曷愬兮擊鼓其鏜山之下兮桂酒椒漿餞神去  
兮功成惠孚去不顧兮攜幼扶鮐民塞路兮卒相有年  
多黍稌兮澤惠無忘永終古兮

右送神

和柯山先生讀中興碑

曲江罷相迹如掃滿朝嬖佞要無諫草動地漁陽鼙鼓驚  
舊將半死哥舒老蜀道乘騾萬里來不識平原濟世才

倉皇靈武送玉冊豈顧九廟蒙塵埃天開地闢扶皇紀  
李郭功成安史死一日三朝有深意臣結胸中老文字  
麻鞋詩老脫賊來北征自足配磨崖我思瀟湘不易到  
誰持墨本心眼開鑒古評詩增感慨無逸圖亡山水在  
君不見阿忠少日歷艱貧湯餅曾持半臂賣

送徐致州交代賜第歸親庭

九五飛龍闡文化明光親策穿楊射重瞳左右列臯夔  
鵠立臚傳玉階下乙科首冠持橐門衣鉢家聲傳子舍



扶陽一經世青氈天語褒嘉增寵假衣冠盛事耀儒紳  
馬走牛醫皆銜咤君才端合連八科麗藻明璣美無價  
他年落筆中書堂更分跋燭金鑾夜詔成速招贊普朝  
感動寧須奉天赦廼翁東山傾士望內集風流繼諸謝  
買船徑度子陵灘不待瓊林霑玉笋謂言歸心馳寢門  
戲綵趨庭及槐夏顧我慚稱李耳孫冗散時遭官長罵  
效顰累月漫咎兒行矣歸田老耕稼

題戚仲騾綱圖

北風吹雪飛千山雪深山徑難往還長林喬木斂秀色  
層崖疊嶂彫蒼顏山腹癡雲結寒潤山巔去天不盈寸  
溪湍岩瀑爭喧豗獸蹄鳥跡皆逃遁中有驛使輸皇綱  
羣騾任重人束裝旌旗不展嵐氣濕鞍轡穩馭鑾聲缺  
危橋當道不可過怒揮鞭箠驅慵惰棧閣縈紆鐵勒寒  
荆榛暗刺羶衣破騾行迢遞風蕭颯倦來誰復鳴鞭梢  
忽逢大渡凜毛骨深沉時若潛虬蛟作急呼舟渡斯水  
尋得舟人來數里一舟已去一舟行掉入深潭浪花起

舟移岸曲人爭先牽騾束貨行揮鞭蘆深峽束積雪滑  
十步九止愁其顛騾行墮敗人捋腹民家借爨黃梁熟  
人餐騾飼幸平恬其奈門前去程促山前山後開梅花  
卧溪枯樹寒槎牙關情一片青煙下深閉柴門三四家  
行行漸出平川路回首千山暝雲霧自知驛舍更一程  
指點山坳深處住解鞍摘貨驛舍寬地爐楫拙煙辛酸  
羣騾入廐人飽睡明朝一驛可輸官絹落并刀慳數尺  
衡從筆墨開胸臆盡將此景作此圖輕描濃抹無凝積

古來摩詰傳天真此手那知復入神好將一本獻天子  
能信邦家本兆民

菁山觀梅歌

菁茅山底梅花村無人惜花與招魂西子猶疑逐范蠡  
玉兒寧肯負東昏數枝含愁月邊吐似隔鮫綃向人語  
欲訴江南萬斛愁一笑嫣然絕媚嫵道人買山今幾年  
山高春早花爭先開門幻出香世界坐覺孤山落案前  
東皇萬里開疆域掌中菴摩妙喜國喚取維摩方丈人

問我本來何所得

隆興改元初余為永嘉監倉時登忠義堂觀顏  
魯公像知其裔家是邦今閱一紀沿檄莆中遇  
軍事判官邵即其人也因請觀常山平原二像  
并大厯顥會昌嗣二誥為賦長句

明皇不識顏平原我觀舊史心慨然天寶末年事大錯  
邊將騁兵相盜權忽聞漁陽鼓輦震二十四郡城無堅  
霓裳驚破西行蜀妃子倉皇死馬前常山平原乃昆弟

屹立砥柱推腥羶土門既失陷河朔天津罵賊鬚髮拳  
嗣皇靈武實草創獨坐鸛立中興年尚書累月家食粥  
諸將列屋羅妖妍嗚呼千載慕廉藺曹蜍李志如九泉  
莆陽幕府東嘉客飽聞裔孫家好賢錦囊重覩忠義像  
再拜恨不為執鞭輕綃盈幅凜生面髣髴冠劍躋凌煙  
沉藏二誥墨色古吾宗贊皇相業傳憐君為米走塵土  
七十青衫雪滿顛乃祖精爽跨箕尾寄書入洛逢飛僊  
莫春過吳松垂虹用聞人伯封韻

具區吳松同一水  
季鷹英靈呼不起  
波平風靜落日明  
一碧青銅三萬里  
幻成水墨思范寬  
點綴卧虹排雕欄  
曜掩楓林帶煙雨  
白鶴飛去何時還  
老子登臨屢春晚  
胸吞雲夢極荒遠  
鞭笞鸞鳳恣遨遊  
幾日蓬萊又清淺  
何時膾鱸平波秋  
湘娥鼓瑟纖指柔  
却跨玉虹朝汗漫  
誰能直釣無垂鈎





欽定四庫全書

芸庵類藁卷二

宋 李洪 撰

五言律詩

雪中問梅

雪擁前村路梅花次第芳月邊誰索笑溪斷忽吹香  
老眼經年別醒魂異昔狂何時真載酒翠羽伴飛觴

宿龍泉院有外氏陳戶曹墳陰德記

外家多積慶絕歎戶曹賢陰德神能告潛光世更繇龍

泉依古寺馬鬣近封阡欲篆蒼崖古慙無筆似椽

喜雨呈二兄

北風吹急雨洗盡旱埃氛河伯驚秋水山君借雨雲  
心田應免握禾把尚能分及此民無殍憂勤實聖君

凍雨排銀竹垂簷一萬條新涼生枕簟餘潤到枯焦  
靜聽欣傾注塵心快洗澆長河從此足不用借鹹潮

久旱  
河流

斷絕方議  
放海潮云

和趙德孚春日

南國春回早梅殘已換年郊原青入眼老境雪侵顛欲  
和歸田賦仍吟止酒篇苦無遊宦樂此興寄林泉

和鄭康道春日三首

寄興滄洲上平蕪綠又春忘機時傲睨燕坐默存真鐵  
硯心逾壯金樓鑄自新年來孤節物懶惰復誰倫

內樂同顏子高樓慕隱居紫苔沿砌合紅糝綴條疎謾  
聽平戎操閒尋種樹書吾曹清淨業所好在三餘

弱柳低垂戶小桃初著花春風無管束貧巷亦矜誇老

覺桑榆迫悲傷常棣華勞生皆有役常苦思無涯

人曰

開歲逢人日今朝又復陰昏霾疑是瘴淫雨欲成霖客裏年華改愁邊疾病侵遣懷詩與酒小醉且長吟

己巳正月十八九間雪復大作不止

早衰常畏雪况復在江干三日不能出數年無此寒捲簾驚澗漾下榻覺蹒跚稚子應憐我孤吟興未闌

探梅

帝所春先到西湖梅自開橫斜窺水鑑想像下瑤臺青  
女嚴霜侍嫦娥借月來景陽鐘漏晚翠羽勿須催

甌粵千山外清愁只箇般澹煙增態度飛霞鬪高寒鄭  
圃乘風馭孤山傍水看少陵詩興動題品信知難  
幽姿矜冷淡別占一家春摩詰聞禪女登伽善幻人解  
愁空索笑能賦更疑神乞與水仙品誰持上玉宸

赦後分祀禹廟有感

禹廟依山麓江濤日到門黎毗半樵牧祝史潔壘樽菲

食雖王意齋祠致主恩人誰思帝德空感習之言

廨舍乃潘閬巷而俗謠為潘堂其地亦俞氏青士園也作詩記之

寓屋詩人巷攜鉏青士園琴書能自足車馬絕無喧松頂凌雲秀蕉心聽雨繁幸無官長罵穉子且磨門

秋日遣興二首

時序循環速還驚一葉飛草衰山自瘦雨罷水增肥  
鱖魚不易得張翰正思歸

倦憎秋暑熾閒喜雨餘清  
箇箇螢相照娟娟月獨明  
濕蝸粘壁死寒草上階生  
吟詠徒愁思嗚咽不得平

沈氏小玲瓏二首

試躡登山屐來尋雲外峰  
題詩喜脩竹長嘯倚孤松  
恠石疑蹲虎深秋有蟄龍  
慚無濟勝具樽酒且從容

十載經行舊松扉靜不關  
巖空覩天巧心遠覺身閒  
古洞無扃鎖飛泉雜珮環  
何須採芝去此地似商顏

十七夜玩月

宿昔妖墓磔

昨夕月蝕

仍圓顧兔靈桂華滋白露輪玉碾青

冥倦翼翻烏鵲愁腸念鵲鴿獨謠成短韻酸楚不堪聽

懼庵

獨擅東南勝能全山澤懼舊傳纏錦襪兼寫輞川圖心  
逐江天遠胸吞雲夢無夫君有丘壑寧復慕陶朱

九日效少陵體

異縣黃花節愁邊白髮生茱萸朝士賜粃粃楚鄉情鴻  
雁何時到霽霖未肯晴今朝一杯酒獨酌似淵明



寂寞

寂寞傷吾道寧為梁甫吟  
霜威凌客鬢雪意動梅心  
酒盡兵無備愁牢病不禁  
簡編聊寓目未覺歲時侵

十一月十九日瑞雪應時百寮入賀僕以病告  
翌日從駕朝德壽宮馬上口占

拂曉開閭闔來朝萬玉妃  
遙知花六出爭瑞日重暉  
入賀鵷鴻綴迎鑾錦繡圍  
鞏梅春最早香透赭黃衣

挽劉刑部詩二首

憲部為郎久琳宮解組歸賜章三品貴眉壽八旬稀橘  
向前洲種金難故里揮淒涼薤露曲淚濕老萊衣

東海于公老當年大里門身為二千石恩及四兒孫富  
壽懸車日悲傷易簣言佳城今日啓松栢閔高原

宿寶寧寺

畏暑征塗倦僧憲借榻眠聚蚊雷隱隱夢蝶晝翩翩喜  
斷梅黃雨慵參栢樹禪潮生富春渚重泛謝公船

夜宿護國寺

積雨長塗淖禪房卧枕書松風醒耳目梅雨上衣裾誤  
着謝公屐寧宜仲舉輿前山聊細數何事擁犀渠

十六夜待月溪濱風露浩然宵中不寐

昨夜中秋月高唐妬素娥憑誰脩玉戶未覺減金波練  
淨前溪水銀侵左界河浩然風露爽通夕祇長哦

過東里

林迥蒼煙古籬踈橘柚黃天高風落木歲晏稻登場無  
復老盆飲空餘鄰笛傷征鴻摩曉月鍛翮犯嚴霜

別姚江

古埭潮迎揖蒼山翠募耕人煙半漁釣方物雜蠻荆宿  
雨迷梅塢過雲望四明匆匆理歸拖未暇膾長鯨

次韻薛士昭琴室

抗志青霞上高情復見今五言冠詩眼三疊翫琴心世  
業含香地傳衣翰墨林朝端方籲俊正始有遺音

丙寅元日

年年元日雨常是一春愁客子詩多感梅花信已休春

風吹柳眼海霧暗沙頭聊舉椒觴酒萱蘇豈釋憂

元宵雨十六日晴二首

每恨元宵雨收燈遽喜晴喧闐雖倦逐勃窣漫徒行入  
夜寒無賴隨人月有情旅懷忘晤賞擁鼻有詩成

衢路人駢疊春來樂未曾初圓新歲月競賞上元燈秉  
燭遊還懶敲門喚不應沃愁須底物況有酒如澠

宿鹽田驛用黃大聲韻

使節經行地南訛夏日長盾威知畏仰暑雨助清涼叱

馭登閩嶠鳴珂入帝鄉拂塵來者敬妙墨尚淋浪

黃大聲見和再用韻

樓船欣集事籌畫見優長倦雨休征旆披襟納晚涼  
輶軒同諭蜀畫錦暫還鄉何幸貽珠玉流傳過樂浪

比至武原省侍叔父二兄因成二詩

竝海風煙古重來歲月侵竹林追勝具棠棣接清陰  
酒聖連宵醉詩魔鎮日吟鳳雛欣競爽家學豈羸金

越角倦游客貧婆行脚僧畏寒便白氎尋壑倚烏藤是

處記遊釣老來無友朋求田漁問舍豈復愧陳登

送武廣叔遊浙東二首

六載交情篤安貧見子難學窮拘邑鼎篆逼嶧山刊歧  
路傷輕別金蘭義肯寒浙東仍歲儉持底勸加餐

羸相去千載規摹筆勢難空興黃絹語誰把翠珉刊並  
海歲云暮耶溪春更寒知君四方志無壁薦盤餐

含暉亭

寶相山前往山中樂可涯鶯啼答春谷犬吠隔山家麗

句題雲葉幽情醉澗花林香與巖氣日夕此亭佳

水口泛舟

染棹搖潏碧推蓬擁翠嵐夜濤喧枕席朝雨暗梅柵客裏將迎倦田家興味甘秋風開病翼歸夢大江南

過瑞林院

薄暮丹洋宿嵌巖下百層飢鷲鳴獨木鼯鼠抱寒藤壞屋惟餘佛空廊不見僧古人經世志客寢每宵興

次韻子永雨中排悶



社燕已成乳吳蠶一再眠  
哦詩聊度日無客倦談天  
夜雨短檠夢春愁錦瑟絃  
蕭然似僧榻香霧散沉煙

次韻仲信雨中見簡

蛙黽幾爭席靈霖苦未乾  
煙花三月暮風柳萬絲寒  
缸面醅初撥床頭易懶看  
客愁無處著何地覓心安

宿臨平寺

客裏疲奔走禪關暫艤舟  
顛毛成種種身世信悠悠  
天路辭鴻鵠江湖狎鳥鷗  
依然庭下栢立雪伴冥搜

錦溪坦上人出示浩然齋詩

一室纔方丈容安亦晏然  
雨花飛燕几繆篆散沉煙  
軟語欣投芥安心不離禪  
老夫慙鑿齒談塵對彌天

送家叔通守光山二首

籍甚賢通守吾家叔父尊  
暫淹紆舊綬久合擁朱轡  
楚甸重分刺邊城已息屯  
前驅須少佇天子有恩言

彼美光山郡風流楚相城  
寢丘聞漢志潘國尚侯名  
泥軼疏榮渥楓宸眷老成  
側聞頌一札持橐奉承明

次韻子都寄示和大監叔西湖早春

白蓮尋淨社紫氣覘幽關吏隱無公事鷗盟俯碧灣泉  
聲襟鳥哢雲卧愛僧閒更欲支筇去過溪多好山

五言長律

送莫子齊知溫州十韻

左省塗歸地嶄然德望優夕辭清禁月高掛白蘋洲丹  
宸深求舊東嘉慶選侯王堂曾視草滄海豈乘桴

叶奕韻

葉甘棠在中州雪浪浮謹謠五馬貴題賞大龍湫顏謝

宜方駕龔黃以上求側聆宣室召寧效賈胡留賤子嘗  
羈宦名山悔夢游黃柑仁壽酒猶足助觥籌

芥庵自述

不厭城隅僻新成芥子庵負暄真化國空想極毗嵐日  
月須彌頂風雲鈇鋸潭冬窮數九九玄旨扣三三何假  
維摩榻偶同彌勒龕羶巾方縱解驪頷或深探處遜心  
無悶居貧實不貪微塵無盡藏安住我伽藍

次韻子都兄大暑

遶屋扶疎樹吾廬粗勝陶去來梁燕語旦夕女蟬號蕙  
槁蘭將敗蕭鉏艾亦薶侵簷添綠竹映日繾紅桃得友  
人皆面哦詩語未高飲泉蔭松栢直欲廣風騷

臘雪

寂寞江村客彌漫大雪天愁雲紛密幕虛籟極饕顛坐  
聽天窻落時將書幌褰胎禽羞潔白閒客失明鮮勢急  
鵝毛墮寒欺鴈翅翩鼠形方誚璞蠟貌遽摧鞭鮫室綃  
盈軸陽公玉種田蝶衣勻膩粉蠶繭剝吳綿近柳橫飛

絮穿榆併墜錢後庭迷玉樹清禁覆花磚  
帝子剪湘水銅仙泣淚鉛銀床漫辱井粉水媚房川  
繁麗真難比縈盈似乞憐玉京樓十二金界地三十秦國占  
烏白遼東獻豕斲尺圍飄洛浦席大記幽燕憶昨逢殘臘  
呈祥慶有年冷侵東郭履寒逼廣文氈喜極損簷和吟餘鹽絮  
聯長城歸大阮巨軸屬羣賢思跨藍關馬將乘剡曲船  
恨拘崇讓里思逸灞橋邊斟酒觴慵舉烹茶鼎旋煎尋  
盟淡生活凍筆尚如椽

偶成律句十四韻

白雪人誰和朱絃世所輕薄才慙吐鳳豪氣欲騎鯨豈  
有江山助應無風雨驚雕龍寧可學刻鵠歎無成韻險  
元非絮詞新敢效顰何如一盃水難比五言城七步才  
空敏千言敵必勑固羞鶴膝病莫繼鳳雛清徒溢牛腰  
軸誰題鴈塔名清新希庾信巧律漫陰鏗鳥過言難補  
魚勞尾自頽只憂生白髮有志撫青萍伯樂方知駿鍾  
期善聽聲敢將嘔心作試就屑談評

東嘉倦雨遣興有懷浙右兄弟二十韻

南國地卑濕兼旬雨不停氣昏江練白雲蔽石崖青倦  
聽淅淅雷全遮渺渺汀柳低齊戶牖竹密亞窻櫺壞壁  
蝸成字衡門犬守局莓苔侵座榻鳥雀聚寒廳歆卧淮  
南枕淋漓座右銘向空書咄咄搔首歎星星乳燕穿簾  
入子規和恨聽消憂須酒聖破睡問茶經異俗徒雞卜  
鄉書賴鵲靈尊羹懷笠澤鶴唳憶華亭旅夢驚蝴蝶原  
情念鵲鴝彈冠即臺閣通籍在朝廷徽福成虛誕忘機



契杳冥蛙喧私鼓吹蚊鬪幻雷霆藥裏開空籠山泉汲  
小餅研蜍臨古蠟香篆讀黃庭林屋連蒼弁松根長茯苓  
江湖長在眼何日遂揚舲

次子清貧居十韻因以述志

貧病同原憲輕肥謂子華耽書祇糟粕學海淼津涯孤  
嶼亭何遠葵丘戍復賒捄窮無髻寶絕粒餌胡麻壯歲  
徒干祿兒時不稱家已諳蕉覆鹿何預鳥銜花世態多  
讒疾心安免怨嗟幕巢同社燕雉堞接昏鴉當食思頗


牧遺忠想尚奢安能效狡獪擲米變丹砂

子永第寄都下大雪律詩

快雪頻占瑞鬢風併助豪白銀天上闕組練浙江濤拓  
地龍沙遠瞻山羣玉高齊宮延孟叟楚些誦離騷絕塞  
綿應折深閨璽獨縑半穿東郭履盡落漢臣旄光射埋  
豐劒銛藏切玉刀月楂迷犯斗嵌洞漫尋嘈禪几巾翻  
氎書帷冊散條詩盟頻敗北酒釀屢逋逃客去氍毹坐  
梅輦萼尚彫圓壇足珪邸夜獵滿弓韜阿閣來儀鳳滄

冥復斷鰲三英陪兔苑五騎聚神臯  
蠖屈深拳跼龜腸更鬱陶  
烏飢聲嘒嘒狐聽響溘溘漁父擁蓑笠  
園公扶桔槔翩翾振鷺集排拶孔鸞翔  
內集詩聯謝回風舞逐曹鵠鮮形詭  
鷺狐白袖垂羔素髮瞻商皓粉袍踵弁髦  
藍關無去馬剡曲有回舸佛刹瓔鬘墜  
仙庭鶴鶴號寂寥閒自適澹泊喜相遭  
目眩花空委頭童手獨搔觀空翻貝葉  
淪茗侍方袍家窶羹憂絮賓稀釜肯轅  
投人真拱壁屬和禿纖毫夢到湖邊寺  
重尋觀裏桃東郊宜擇

勝聯騎許追邀



欽定四庫全書

集部

芸庵類藁卷三

四

詳校官庶吉士臣何道沖

主事臣呂雲棟覆勘

謄錄監生臣徐元秀

欽定四庫全書

芸庵類藁卷三

宋 李洪 撰

七言律詩

簡崇德萬令

十載交期晚益親  
絃歌尤喜政聲新  
倦游偶是臨邛客  
索價慙非少室人  
旅舍誰驚五漿饋  
官梅初見一枝春  
挂帆明日歸苕霅  
從此詩筒莫厭頻

殘臘喜雪

散亂明璣濺竹窗不聞簷雷響錚鋌剪成闌苑瑤英六  
絕勝連城白壁誰又獨覺瓔鬢彌寶所豈無蓑笠釣寒江  
饑腸雷吼呵吟筆睥睨詩壇未豎降

立春前一日再雪因用韻

重雪催詩夜映窗杉枯竹折恣撐攢交飛梅徑妝纔半  
舞對鸞臺影自雙面壁誰參少陵室羊裘試問富春江  
豐穰可卜卯年瑞展拓邊城築受降

除日立春雪

獻日春回一日先勾芒清曉試花權要看臘雪連春雪  
獨占新年與舊年梅綻香唇纔半樹柳蘚睡眼待三眠  
東皇次第開桃李誰顧寒松澗雪邊

春雪呈通判叔

無奈春來節物催東君更遣玉花開寒輕纔濕新池草  
勢密重飄靜院梅麥隴潤滋豐餅餌秫田膏澤足醪醕  
疲民盡說豐年瑞獨恨千山阻鴈回

雪



朔風動地似奔雷瑞雪飛飛徧九垓玉局盡疑從地湧  
銀臺空訝倚天開西經佛國千峯外北過天山萬里來  
誇賦兔園非我事直須興盡棹船回

六幕同雲歲又殘忽驚臘雪滿羣山誰知曳履塗中去  
端有披蓑江上還三白吉祥千里內六花飛舞兩楹間  
詩成自怪無奇語欲壓劉叉思覺慳

仲躬示侍郎丈筭字韻詠雪次韻

溪汀渺渺躍鳬翁織浪雕雲訝許同散漫六霏疑剪水

連娟萬舞趣回風  
瞻山遐想崑邱勝  
宴坐方觀色界空  
繡斧謝庭聯內集  
刑清寧用鉅為筭

次韻寺丞叔都城喜雪

東郊初未布陽和  
湖上祥雲點淥波  
重壁臺遙黃竹作  
孤山園近落梅多  
表儀共仰豐年玉  
賦詠宜陪賡載歌  
誰憶漁舟向西塞  
千山徑絕獨披蓑

雪中偶成呈周明遠

巽二初分北帝權  
忽飄瑞葉表豐年  
隨車逐馬難為比

入隙開簾絕可憐  
凍鎖官梅枝  
嫋娜寒欺塞鴈影  
聯翩  
袁安門閉惟高卧  
遙憶溪頭訪戴船

次韻仲信雪中見簡

夜窗初映月如霜  
凌晨瑤霏勢渺茫  
清室乍欣文解崇  
淺斟應愜醉為鄉  
幽蘭儷曲三豪集  
黃竹興謠八駿驤  
聞道子猷思泛剡  
兩溪絕境較優長

簡章叔鎮

海昌一別十三秋  
僚舊相逢雪滿頭  
公負才能猶掌庾

我須踈散尚監州樽前強健應須喜身外無名勿用憂  
昔日長官今繡斧吹噓應念蒯為緱

題雪峯

象骨峯前古道場簡菴再到愈芬芳地平雙徑崇宮殿  
名壓三山有雪霜栗棘金圈提祖令奎文寶墨閱宸章  
海昌曾禮光明相重薦鑪中知見香

鹽官縣有雪峯庵今為壽聖院

初冬見雪

頗怪寒威一倍添天花回旋落層檐慵賡險韻偏工絮

自哂微官獨帶鹽問訊梅梢半封萼爭看蝶舞不鉤簾  
小兒學誦封胡句羔袖烘爐任附炎

塗中書懷

載馳十驛倦驂駢已訝緇塵染素衣歷歷征人數行店  
翩翩越鳥戀南飛貪看樹向城頭綠不覺春從海際歸  
客鬢漸凋孤壯志豈緣微祿戀輕肥

元夕書懷

好在東君管物華倦游歸思渺天涯春永夜市心空壯

聽鏡探官事更賒尚怯餘寒破桃萼坐看細雨落簷花  
家僮應照田蠶蠶頻曬漁蓑理釣車

監試院秋夕無聊得日華寄詩

傑屋青燈夜不眠誦君佳句喜跼然別來已覺三秋遠  
書到難憑一鴈傳濃淡西湖真在眼釣樞東閣況蒐賢  
徒勞屢起江鄉興歸釣槎頭縮頸鰌

次韻王龜齡貢院

浩渺春波暖白蘋溪頭廣廈旅楹新佩衿無復歌游闕

糟粕空慚老斲輪門外緼袍人立鵠榜間淡墨筆如神  
使君道德魁天下膏馥分沾盡澡身

送滕彥道除太府寺簿歸吳門需次

論交先友接樞廷末路為寮喜典刑桃李春風同扈蹕  
衡茅夜雪並寒廳暫從簿領陪卿月行握蘭荃應列星  
臨別遙思五湖樂望中林屋已青青

清明遣興呈郭次張

倦遊佳節負清明禁籞芳菲未遍經楊柳堆煙猶冉弱

杏花著雨半飄零  
街頭車馬來還去  
客裏壺觴醉復醒  
賸喜祥林洗塵土  
吳山相對眼偏青

次韻秋日遣興

西風暑退喜清秋  
倦客漂流滄海頭  
用舍行藏知有命  
山林鐘鼎豈能謀  
汗青漫志三餘樂  
養素寧忘一溉收  
鵬鷖逍遙天壤內  
何勞八極賦神遊

秋晚閒詠

六年門外送蒼溪  
遠舍黃花獨杖藜  
安有鶴觴逢白墮



新成螭蓋得朱提  
流匙乍飽豐年玉  
病齒全疎釘座梨  
欲問福城南去路  
江山猶得助難題

用前韵簡日華

遲遲欲去戀雙溪  
獨樂簞瓢不糝藜  
豈稱昔賢為半刺  
只堪老宿話全提  
家貧未辦千頭橘  
世習猶堪兩顆梨  
速丐雄篇重行橐  
三山佳境易為題

次韵元量春遊

恰恰鶯簧百轉齊  
提壺仍勸醉芳蹊  
麴塵弄日腰肢弱

翠黛凝顰眉嫵低泉石似尋天竺寺漁舟引入武陵溪  
少年簇馬觀遊女勒住金銜不放嘶

次王仲信食粥

太白狂歌力士鎗未如食粥魯公清從教過午饑腸轉  
政坐哦詩青眼橫奇怪爭觀出月脇詎諧猶足助言鯖  
卧聽古寺華鯨吼飮顆誰憐太瘦生

臘夕直宿枕上偶成

北風洶洶應嘉平點滴簷間雨未晴病骨可堪寒栗烈

老懷仍怯歲崢嶸  
湯婆漫漫許登禪  
榻黃妳無因伴短檠  
庫中清絕夜闌愁  
不寐擁衾龜息待  
窗明

步過仙霞嶺

迢遞南詢過百城  
五漿先饋不須驚  
侵尋老境凋雙鬢  
耿介孤忠有寸誠  
入眼越山多秀色  
背人閩水大無情  
扶筇跼步仙霞嶺  
自笑嬰跚勃率行

次韻德字詠梅

徙倚名園鎖綠苔  
亭亭水艷為誰開  
乍疑奔月常娥去

忽見尋梅僧孺來淺笑故應窺水鏡片飛看復落深杯  
王孫家有雪兒唱莫待霜天曉角催

初陪扈從

紫禁晨曦拂曉開南山秀色鬱崔嵬立班馳道蒼龍闕  
逼耳嵩呼遶殿雷清蹕一聲黃繖動屯雲萬騎景輿迴  
端門緩轡哦詩罷誤入鈎陳豹尾來

次韻馬駒父大閱

譚笑詩成馬槊橫偏師何敢犯長城縱觀儒帥臨戎幕

想像天山破敵營  
麾幟精明嚴武備  
山川彈壓颺威聲  
老來壯志渾消盡  
射虎南山媿北平

和子都兄修佩魚

恩假銀魚閱四年  
新元瓜戍尚悠然  
滯袍自肯多屯蹇  
英袞當時誤軫憐  
司馬青衫佐湓浦  
參謀朱紱向西川  
玉堂伴直如相念  
安敢沉酣不上船

陳伯和和經字韻復以為報

說詩夜對老彌明  
韋氏傳家自一經  
盛德於今推鼎甲

聞孫何事亦飄零囊貧桂玉人逾瘦袖有珠璣耳暫醒  
桃李春殘歸未得愁看煙草五門青

南臺點集海艦

粵國無諸故壘推吐吞江海亦雄哉峯巒疊疊青螺髻  
翠幄重重錦繡堆破浪乘風浮戰艦荒烟落日傍龍臺  
倦遊已喜瓜期近立馬沙邊更幾回

陪史志道侍郎徧覽南園北第之勝即席賦詩

我公宵次妙陶甄幻出壺中小有天地近滄浪占風月

目吞笠澤飽雲煙王孟金盃開新第燠館涼臺繼昔賢  
聞說傳巖通帝夢遙歸黃閣卧貂蟬

共樂臺

鱗差萬瓦拱層臺暇日登臨亦樂哉桃李成蹊春未到  
江山如畫國多才倦遊難效登樓賦勝槩常遭俗駕回  
好是清宵携客醉雲間兩兩近三台

和人松江

來往吳松二十春五湖煙月舊知津高秋楓落哦佳句

斜日江邊膾細鱗誰解扁舟載西子獨憐茶竈老詩人  
自慙遮日長安道深愧漁蓑浪漫身

八月十八夜月有懷伯封

秋半青要未降霜溪邊獨對露華涼風清月白興不淺  
斗轉參橫夜未央每望庾塵頻障扇莫逢伊笛據胡床  
揚暉千里誰同賞心折刀頭快理航

秋夜艤舟駱駝橋對月

新秋清夜月當空弭楫駱駝橋意象雄銷恨難求賢士酒



揚塵厭共庶人風市聲暫息更籌永漁唱頻驚客夢中  
紺碧瑠璃千頃淨頑仙常占水晶宮

哭樂寮先生

先友凋零風義良繡衣躡履荷深知未乾薦墨俄聞謫  
欲寄郵書忽報危賦就徒能感知已樽前猶憶細論詩  
白珪一玷身難贖痛哭須陳弔屈辭

哭幼子二首

兼旬哭子鬢成絲老眼眵昏淚綆縻玉雪可憐凋並砌

金環無復探鄰枝何堪投杖逢曾子誰解推天繼退之  
滄海逝波無返日覺城南去有逢時

苗而不秀實天年亭近千秋瘞祖阡季札於嬴稱達禮  
樂天學佛尚成篇情鍾我輩誠難遣古有東門豈信然  
恩重詎堪耘愛草擬將苦諦問南泉

次韻子都兄寄伯封論書

絕藝當如郢匠斤家雞野鷺漫分羣山陰妙法羲傳獻  
江左名聲薄繼欣競作墨豬無健骨誰知筆髓貴豐筋

斯言舉似秦谿後三折君須子細分

移竹詩伯封垂和且聞兄弟皆欲作因用元韻

奉寄

海甸尋盟肯遽寒  
巨嗔久未豎檣竿  
張儀尚有口中舌  
貢禹未彈頭上冠  
處處句奇有神護  
行行墨妙似龍盤  
阿連知有驚人語  
鶴膝因君舉似看

密密脩簷入檻寒  
君來移取出簷竿  
結根久近幽人屋  
解擇宜為壯士冠  
曾共馬蘭同請客  
不憂苜宿但堆盤

從今莫羨蕭郎畫風月良宵仔細看

秋雨歎

西風獵獵暮秋天昏霧淫霖海氣連雨脚如麻雲潑墨  
禾頭生耳稻漂田庭前槐樹惟增歎堦下決明空可憐  
愁絕寒儒思廣厦床床漏屋夜無眠

尚善再用韻訪梅

不憚詩催白髮生年年梅綻酷留情寒枝幻出橫斜影  
舊曲猶堪一再行越嶠雲霾春最早西湖煙水夢尤清

他年相望千山阻公在鑾坡我退耕

泊石壁值雨

江頭驟雨壯灘聲洶湧琮琤亂石鳴咫尺煙林展圖畫  
二三村落隔陰晴方貪暘暑逡巡退坐覺風霜指顧生  
試倚蓬窗臨石壁哦詩心迹得雙清

探梅次韻章庭倚

江園試覓去年梅花下遨遊得暫陪脉脉早迎南至  
垂垂先放北枝開江邊牆角添詩興月落參橫喚夢迴

一見清香心已醉何須更待麴生來

欲探梅西山簡元量

尋梅試欲向江津  
冷蘂商量效小蟬  
洗雨梳風無那瘦  
巡簷索笑為誰春  
西湖苦憶微吟老  
庾嶺偏愁折寄人  
知有清詩似何遜  
可能嚼蠟對橫陳

得家書

傷春渺渺獨凝眸  
黃耳歸時暫放愁  
跪得雙魚開尺素  
別來一日抵三秋  
花前塊處憐秦贅  
澤畔行吟類楚囚

預約鯉庭歸省處清微風送木蘭舟

游石門洞

溪壑縈紆礙去舟石門雄峭未曾游雲深飛瀑自成雨  
洞闢雙扉最上頭紫府丹臺疑有路碧巖紅樹飽經秋  
追懷顏謝當年興坐聽猿吟和四愁

題外舅墳庵

昔年把酒共看山猶冀相從物外閒零落山邱遽如許  
膏肓泉石許誰攀形神孰與論三住夢幻全真悟八還

拱栢喬松助蕭瑟獨乘明月弄潺湲

歲除

客裏光陰又一年人情真復似憐蛇家貧尚有春名酒  
才拙安能雪命篇弱柳經霜半凋落修篁沐雨更便娟  
親交歲晚無書劄常閉柴扉穩晝眠

十六夜待月海上

月到中秋已壯觀更看飛出海邊灘光連貝闕鯨鯢駭  
冷射蓬壺鼉鼉寒萬頃銀濤俱皎潔一輪金魄尚團圓



當年太白曾觀此寧肯呼為白玉盤

題李提刑事實

名范字積仁

百雉安危歟唾中三平狂寇不言功魯連解難高千古

回紇投戈見此公欲上史官傳逸事要觀若令獨稱忠

儻能配食鄉人社宗衮宣城偉績同

宣城郡人以故太守李光捍寇全城

列歎于朝立廟

春晴

佳晴遊侶賞穠華免使綸巾雨墊紗冉冉芳塘徧春草

溶溶流水蘸桃花閒官尚許親黃卷學道安能佩紫霞  
多病無心與春競窗前靜聽晚蜂衙

次韻子濟兄送行

春草年年愁望勻鵲原鼎足嘆離分惡詩恨別江南社  
鴛馬慙辭冀北羣細雨催行將食冷片帆歸省待風薰  
贈言況得珠璣句筆陳翩翩妙五雲

壽老餉笋

陋巷晨炊樂一簞慕羶逐臭兩知難自甘香積伊蒲饌

寧歎攔干首肯盤禪老竹萌資淨供詩人菜把誚園官  
喜參玉版宗風在何待叢林一擊看

隱巖吳體

屋頭日日闖雲山薄領沉迷肯放閒一行作吏遽如許  
三徑就荒那得還綠陰留與後人憩叢桂時招好客攀  
邂逅清泉與白石岸巾時得洗衰顏

題雲間尉廳吏隱

東南一尉笑卑栖小試崑邱並海涯千里僧包游雁蕩

九霄鵬翼躍天池南昌隱吏真相稱西蜀參謀更好詩  
官舍從來同傳舍清規留與後人師

飛霞洞謝公巖呈元量

謝公遺躅閼蒼苔乘興飛霞得得來洞鎖暮雲松偃蹇  
江涵白月影徘徊吾曹趣了癡兒計羅徑難留俗駕回  
安得麻姑能送酒他時藉草共傳杯

元日

元日歡情客裏稀追陪人事強開眉不知爆竹催年去

但恠屠蘇到我遲  
梅藥欲撩東閣興  
宦情終愧北山移  
未甘直道猶蕭索  
詹尹何辭為拂龜

題羅源尉廨壁

坐來山氣結層陰  
解纛迎涼濯暑襟  
賴有新詩成獨諷  
惜無嘉客伴孤斟  
綠荷翻雨傾珠碎  
翠竹搖風引鳳吟  
習射更思矍相圃  
麗龜試看僕姑金

別吳興從游

五亭四水盛游從  
閒客閒行興每同  
暫捨玄真漁隱計

却尋康樂舊詩中振衣濯足滄浪水快意迎人舶颶風  
儻有任公投巨膽割鮮共飽漈河東

次韻仲信留別

倦游再閤入都門喜見隆興詔令新功業詎堪銘日觀  
龍鍾空歎倚天津題詩竹閣逢寒食修禊蘭亭及暮春  
我欲扁舟成泛宅五湖煙月伴漁人

錢塘遇沈時仲匆匆索別

三年啄腐共吞腥乍解南冠覲舜廷新貴論交頭漫白

吾曹相遇眼終青  
休嘆輕薄紛紛雨  
還恨分攜落  
落星  
歲晚江湖未歸客  
蒯緱彈鋏不堪聽

九日與客登鳳凰山酌湧金泉泛舟西歸

西山爽氣壓城閭  
携客登高日未晡  
稚子已諳撐舴艋  
老夫羞更挿茱萸  
文章不進空黃妳  
生計無多問木奴  
貧病偏愁秋欲雨  
異鄉白盡逐良鬚

九日詠懷簡仁實

登臨勝踐負幽期  
山色溪光日益奇  
那得賜茱來北闕

漫從採菊向東籬  
升虛楚望猶能賦  
振履商謳祇自悲  
可是閒居愛重九  
尉仙落筆有新詩

淮上亂後寄子都兄五詩

黃耳東來喜可知  
鵠原書札慰愁思  
艱難莫話平時事  
愁絕長吟別後詩  
再到空存舊城郭  
遺黎重覩漢官儀  
故鄉枌梓凋零甚  
夢寐鹽城祇益悲

憶昨王師北渡江  
山東豪傑已爭降  
銜枚夜雪俄平蔡  
斫樹明書果死龐  
志士裹尸須馬革  
舊官祭竈熟羊腔



老姦牖下終何幸  
遠愧睢陽廟食雙

兩淮黔首苦飄零  
廟算成功再底寧  
頭斫新都據宿憤  
臍燃郢塢赫王靈  
羌人半已投戈拜  
父老從觀扶杖聽  
欲勒燕然繼隆碣  
太書誰紀史編青

殘臈倉皇間道奔  
相逢悲喜語還吞  
巡簷慘淡梅花月  
壽酒淋漓拍葉樽  
禦敵孤城存即墨  
還家聚首似羌村  
見幾在宮思深戒  
只恐黃金注自昏

多病新年白髮生  
愧無籌策贊親征  
羈紲空作餓鴟叫

逐兔休嗟走狗烹鳳閣鸞臺少知己天台鴈蕩恣經行  
可憐未遂求田計空負江湖浪漫名

扈蹕玉津園

麗日祥雲覆苑牆柳絲馳道麴塵黃山呼萬歲迎春仗  
花覆千官獻玉觴駉駉籥雲天步遠騶虞節射樂聲長  
御射中的  
必奏樂云微臣奉引陪鵷鷺許聽簫韶入建章

泛舟之龍塢

茗花如雪忽秋殘翠老溪頭幾曲山心逐浮雲朝獨出

家臨清雪暮能還世情大似醉翁醉景物偏偷閒客閒  
早晚誅茆繼三徑招呼明月弄潺湲

寒食日從駕聚景園

宮殿千門敞禁闈西湖綵仗小遲徊競瞻黃屋寧親樂  
更喜重離捧壽杯萬騎戎裝花底散一聲清蹕日邊來  
天街向晚珠簾卷十里春風待駕回

游華蓋山容成洞天

小雨廉纖早釀寒清晨來訪道家山寂寥玉座纓香覆

點綴碧巖楓葉丹地勝七山星有斗人疑千歲鶴飛還  
閒緒洞簡尋真訣脉望難求髮似環

錢史開府奉祠歸四明

千載風雲佐命期黑頭先冠鳳凰池赤明龍漢昇平運  
河目龜文柱石姿譚笑功成調鼎鵲燮和元化靖華夷  
拂衣袖手林泉樂咸仰中興帝者師

衮繡貂蟬侍太清致身將相極儒生三槐正位巖瞻峻  
兩鎮交兵節制榮畫錦蚤傳留鑑水召棠重喜蔽龍城

願將閭里新謠詠長和滔滔西峽聲

千里全閩按八州曾聞三相袞衣遊誰知今代甘盤學  
寬盡吾皇南顧憂家給乞漿皆得酒年豐賣劍有耕牛  
詩歌綠竹為公壽父子應須並相周

主眷方隆便乞身共欽勇退解樞鈞湖山勝槩神仙宅  
文武宗勲社稷臣未許赤松陪杖屨却須黃閣再經綸  
蒼生指日為霖雨仄耳宣麻寵數新

和玉泉達老餉筍

籀龍孤介亦駢闐不比花萼與柳眠雪裏頓超千佛地  
風來應上四禪天飽參玉版頭頭是秀出鄉林箇箇圓  
知我遠庖薇蕨少倒籠登俎共便娟

和尚善西禪寺冲虛宮詩

學道尤須惜寸陰漫勞飮袋走叢林  
為山自昔提宗印  
閱嶠于今絕賞音得髓得皮無著相  
非心非佛見機深  
豐干未免成饒舌月在碧潭空指心

飈馭臨風杳靄間支筇款步訪星壇  
羽人莫問昇真事

古像空瞻玉佩寒井冽不逢龜曳尾鼎存猶想永新乾  
徘徊遐想來仙驥皂莢成陰荔子丹

雨中慈感寺泛舟

渺渺汀舟雨滿川樓臺煙靄罨愁邊春風邀勒梅都謝  
夜雨淋漓浪擲尚妍僧鉢偶分蒲塞供佛香時送水沉煙  
佳時更擬携筇出拾翠人歸喚渡船

謁曹娥祠

貞魂純孝瘞江湄滿目江山故國祠海賈時來楫迎汝

山君欲下桂為旗九歌合繼湘妃些千古塵昏幼婦碑  
月午潮平波似練蕭蕭風竹隴猿悲

追和下若大雄寺汪內相陳朝檜詩

斲骨剗心操凜然盤根厚地老逾堅八千椿木應同壽  
十五克蕢莫紀年辱井已荒傷故國瓊枝無復盜春權  
六朝陳迹空餘此閱世真成歎逝川

送許季韶倅桂林

尺五天邊看頽頽參辰出處九星霜未令掌誥吟紅藥



屢喜嘉言貢皂囊懷紱寓居欣會弁監州歲晚客殊方  
桂林賴有詩書帥好共驂鸞上玉堂